

嘉業堂
叢書

南唐書注

第八册

卷之三

三

南唐書補注卷三

吳興劉承幹翰怡

後主名煜 **補注**負暄雜錄後主名煜故鸛鵒改稱八哥

元宗第六子 **考異**五國故事以煜爲璟次子

初名從嘉 **補注**米芾畫史錦峰白蓮居士皆李重光

畫又後主有看經發願文自稱蓮峰居士 十國春秋

引宣和畫譜云李煜政事之暇寓意丹青自稱鍾峰隱

居其說與沈括同然李薦畫品謂南唐鍾隱天台人以

其隱居鍾山遂爲姓名蓋處士也畫史又謂李重光題

畫每日鍾隱筆上又著內殿圖書之印及押用內合同

集賢院黑印爲後主收藏鍾隱畫無疑十國春秋失考
文獻太子惡其有奇表 **補注**鈞磯立談叟昔於江表

民家見竊寫真容觀其廣顙隆準風神灑落居然有塵
外想 宣和畫譜御府所藏有周文矩寫李煜真三又
畫史云李重光道裝像神骨俱全云是顧闳中筆

惟覃思經籍

補注

袁褰楓窗小牘余嘗見內庫書金

樓子有李後主手題曰梁孝元謂王仲宣昔在荊州著
書數十篇荊州壞盡焚其書今在者一篇知名之士咸
重之見虎一毛不知其斑後西魏破江陵亦盡焚其書
曰文武之道今夜盡矣何荊州壞焚書二語先後一轍
也詩以慨之曰牙籤萬軸裏紅綃王粲書同付火燒不

是祖龍留面目遺篇那得到今朝書卷皆薛濤紙所鈔
惟今朝字誤作金朝徽廟惡之以筆抹去後靖康中書
畫圖史盡輦入金竟如讖可異也按金樓子六卷梁元
帝著 阮閱詩話總龜翰苑名談云李煜作詩大率多
悲感愁戚如青鳥不傳雲外信丁香空結雨中愁鬢從
今日新添白菊似去年依舊黃然思清句雅可愛

自是始降詔

補注通鑑長編初周世宗旣取江北貽

書江南書如唐與回鶻可汗之式但呼國主而已上因
之於是始改書稱詔

龍翔軍

補注南唐百官表有龍武軍都虞候淩波都

虞候

王楙野客叢書南唐時宮中嘗賜洗兒果有近臣謝表云猥蒙寵數深媿無功此正用世說殷羨事而李後主亦曰此事如何著卿有功故東坡洗兒詞謂深媿無功此事如何著得儂又用南唐史中語按諸王列傳後主二子仲寓仲宣皆昭惠周后所生宋乾德二年仲宣纔四歲是仲宣建隆二年生也

李燾續長編唐主擢張佖爲監察御史

佖書詳十一卷江文蔚傳

後佖因劾奏德昌宮使傅宏妄毀都城所剝樓堞率多隳壞禮賓使孟駢建議於星子造大艦以禦敵累年不能成蠹國害民皆請置法唐主不聽手詔開諭之罷諸道屯田務歸本州縣唐主用尙書員外郎李

德明議興復曠土爲屯田以廣兵食水部員外郎賈彬嗣成之所使典掌者皆非其人侵擾州縣豪奪民利大爲時患及用兵淮南罷其尤劇者尙處處有之至是悉罷使職委所屬縣令佐與常賦俱徵隨其租入十分賜一以爲祿廩民稍休息焉注云闢曠土爲屯田在廣順二年罷屯田害民尤甚者在顯德三年又八月甲辰唐桂陽郡公徐邈奉其主景遺表來上冬十月癸巳唐主以皇太后山陵遣兵部侍郎北海韓熙載太府卿田霖來助葬唐主以南都留守韓王從善爲司徒兼侍中諸道兵馬副元帥鄧王從誼爲司空南都留守令諸司無職事官各上封事三兩

條時有才高位下者私喜其言得達多所開陳而迄莫施眾始失望

宋史五行志妖星建隆二年五月己丑天狗墮西南方

遣水部郎中顧彝入貢京師

補注按江南餘載後主

時文臣中有顧彝名但事實未見耳

宋史五行志建隆三年七月南唐李景獻鳳卵按景應作煜又云泰州潮水損鹽城縣民田

續長編三月乙亥遣使如江南賜唐主生辰國信物夏四月詔奉使江南者毋得將其國所用錢過江北先是唐將士降者其家屬猶在江南五月丁巳朔詔

唐主尋訪發遣十一月壬午初頒厯於江南

太祖出師平荊湖

補注東都事略高繼沖字贊平其

先陝州硤石人也曾祖季興守荊南梁開平初封秦王
卒諡曰武信子從誨後唐天成三年襲位封南平王卒
諡曰文獻子保融漢乾祐五年襲封南平王卒諡曰正
懿無子建隆元年其弟保勛嗣立四年卒其子繼沖嗣
位時湖南張文表叛周保權求救於朝廷太祖命慕容
延釗討之延釗假道荊南繼沖出迎而前鋒遽入其城
繼沖懼上表納土請舉族歸朝乾德三年拜武寧軍節
度使卒年三十二贈侍中 宋史五行志漢乾祐中荆
南高從誨鑿池於山亭下得石匣長尺餘扃鑰甚固從

誨神之屏左右焚香以啟匣中得石有文云此去遇龍
卽歇及建隆中從誨孫繼冲入朝改鎮徐州龍隆音相
近

還其故土

補注續長編上命唐主發遣揚州戶口及

周顯德以來將吏隔在江南者唐主遣使請緩期戊子
許之**注**云國史載戊子初命李煜發遣誤也今從實錄
置折博務 **補注**玉壺清話乾德初國用未豐蘇曉爲

淮漕議盡榷舒廬蘄黃壽五州茶貨置四十四場一萌
一槩盡搜其利歲衍百餘萬緡淮俗苦之後曉舟敗溺
淮民比屋相賀

魏丕

補注陸游入蜀記戒壇寺古謂之瓦棺寺有閣

因岡阜其高十丈李太白所謂鍾山對北戶淮水入南
榮者又橫江詞一風三日吹倒山白浪高于瓦棺閣是
也南唐後主時朝廷遣武臣魏丕來使南唐意其不能
文卽宴於是閣因求賦詩丕攬筆成篇末句云莫教雷
雨損基扁後主君臣皆失色及南唐之亡爲吳越兵所
焚 按宋史明言魏丕來弔祭李燾偶失檢耳瓦棺閣
烈祖初年改爲昇元閣

宋史太祖紀乾德二年二月甲戌南唐進改葬安陵
銀綾絹各萬計五行志云五月揚州暴風壞軍營舍
僅百區按王士禎香祖筆記云僅字有少餘二義唐
人多作餘義至宋人始從少義迄今沿用之宋史謂

風壤僅百區應作餘義如玉壺清話吳越災南唐先
主信以帑幣糧餼僅百餘艘之類

聖尊后鍾氏殂

補注馬書自注云朝廷許元宗追復

帝號故鍾氏稱皇后

岳珂程史二徐名著江左皆以博洽聞中朝而騎省
鉉又其白眉也會修述職之貢騎省實來未及境例
差官押伴朝臣皆以辭令不及爲憚宰相亦艱其選
請於藝祖玉音曰姑退朝朕自擇之有頃左璫傳宣
殿前司具殿侍中不識字者十人以名入宸筆點其
中一人曰此人可在廷皆驚中書不敢請趣使行殿
侍者慌不知所由薄弗獲已徑往渡江始宴騎省詞

鋒如雲旁觀駭愕其人不能答徒唯唯騎省叵測強
聒而與之言居數日旣無與之醕騎省亦倦且默矣
其不戰而屈人之上策歟 按吳王墓志稱後主勤
修職貢府無虛月而使臣多闕載考乾德三年宋史
謂二月癸卯南唐進長春節御衣金銀器錦綺以千
計四月癸丑南唐進賀收蜀銀絹以萬計而使者姓
名俱莫考徐鉉一條特附於此

稽神錄陸洎爲淮南副使與李承嗣雅善乙丑歲

後主

年九月洎夢人以騎召去止大明寺西可數里至一

大府署曰陽明府入門西序復東向大門下馬入一
室吏引立階下門中有二綠衣吏捧一案案上有書

一紫衣秉笏取書宣云泊可爲陽明府侍郎判九州都監事來年九月十七日本府上事復以騎送歸奄然驚寤泊與人言至明年九月十六日承嗣復往候之泊曰府中已辦明當行矣承嗣曰君無近妖乎泊曰君與我有緣他日當爲鄰明日遂卒葬於茱萸灣承嗣後爲楚州刺史卒葬泊墓之北云

慎儀至番禺被執

補注乾隆府廳州縣圖志廣州番

禺縣番山在縣城東南以番山禺山得名山海經謂之賁禺禺山在縣西南一里漢尉佗葬於此

考異按此

條年誤十國春秋誤同注詳開寶三年

江南餘載楊守忠授武昌節度使宣麻日有禿鷲當

正衙立班退乃去未幾而守忠卒 宋五行志乾德四年二月長春節甘露降江寧府報恩院四月廣陵揚子等縣潮水害民田

劉貢父詩話太祖欲改元須古來所未有者宰相以乾德爲請且言前代所無三年正月平蜀有宮人入掖庭者太祖因問其鏡匳背乾德四年大驚曰安得四年所製乎宰相不能對陶穀竇儀奏對曰蜀少主王曾有此號太祖歎曰作宰相須是讀書人然二公又不知輔公祐已有此號矣按公祐隋末人

直光政殿

補注

宋五行志乾德五年二月甘露降江

寧府玉泉寺松樹

盛時泰蒼潤軒碑跋五代任德筠本業寺碑跋云右
僧契撫撰東山任德筠書乃南唐乾德五年所立者
按記言天鑒九年僧淨玉捨宅爲寺保大五年宣義
開寧兩鄉人周俊周昶等請開善僧令安修之碑乃
爲安而立者予嘗記志言謝靈運謝惠連墓近本業
寺地名謝塘屢欲游之甲寅同友人自棲霞至寺入
門石徑甚幽而殿正與鍾陵之陰相對寺後亂石蹲
踞如萬羊問寺人以謝墓不知所在作詩弔之以還
今回思之都忘其景象惟碑內言東接文園昔是儲
君之主西連蔣嶠今茲蕭寺之蹤者髣髴其形勝爾
丁巳五月十八日記

境內旱

補注

清異錄李主在國時自作祈雨文曰尙

乖龍潤之祥

立國后周氏

補注

李燾續長編云唐主納后周氏昭

惠后之妹也唐主旣納周后頗留情樂府監察御史張
憲諫云云按昭惠后好音律能勑爲新聲故唐霓裳羽
衣曲后得殘譜以琵琶奏之復傳於世後主因亦耽嗜
張憲切諫賜帛三十匹詳見昭惠傳續長編誤屬小周
后當以是書爲正

續長編三月唐主以勤政殿學士承旨兵部尙書修
國史韓熙載爲中書侍郎百勝節度使兼中書令熙
載上疏論刑政之要古今之勢災異之變及獻所撰